



Broj: UP09-07-1-2250/19  
Sarajevo, 29.01.2020. godine

Ministarstvo pravde Bosne i Hercegovine, rješavajući Zahtjev „Asocijacije kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a, zastupane po Zajedničkoj advokatskoj kancelariji Jasmir Muratović, Tanja Hadžagić, Ilvana Bijedić, za upis promjena u Registru udruženja, na osnovu člana 34. stav 1. Zakona o udruženjima i fondacijama Bosne i Hercegovine ("Službeni glasnik BiH", br: 32/01, 42/03, 63/08, 76/11 i 94/16)(u daljem tekstu: Zakon) i člana 4. stav (1) Pravilnika o načinu vođenja registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija («Službeni glasnik BiH», broj 44/10 i 14/12) (u daljem tekstu: Pravilnik), donosi

### RJEŠENJE

Odbacuje se Zahtjev „Asocijacije kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a, od 29.10.2019. godine, za upis promjena u Registru udruženja kod Ministarstva pravde Bosne i Hercegovine.

### Образложење

„Asocijacija kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a (u daljem tekstu: Asocijacija), upisana je u Registar udruženja kod Ministarstva pravde Bosne i Hercegovine, pod registarskim brojem: RU-28/02, Knjiga I Registra, dana 12.09.2002. godine.

Asocijacija je 29.10.2019. godine podnijela Zahtjev za upis promjena u Registru udruženja ovog Ministarstva, putem ovlaštene osobe, koji je dopunjen podneskom od 08.11.2019. godine.

U toku postupka Ministarstvo je utvrdilo da zahtjev nije potpun, te da sadrži nedostatke i nepravilnosti zbog kojih nije moguće izvršiti upis promjena u Registru udruženja. Ministarstvo je aktom, Broj: UP09-07-1-2250/19 od 06.12.2019. godine zatražilo ispravku i dopunu zahtjeva. Navedenim aktom, podnosilac zahtjeva je upućen u kom dijelu je potrebno izmijeniti i dopuniti zahtjev, te da će Ministarstvo rješenjem odbaciti Zahtjev za upis promjena u Registru udruženja, ukoliko podnosilac zahtjeva ne otkloni nedostatke u predviđenom roku.

Podnosilac zahtjeva je podneskom od 25.12.2019. godine dostavio slijedeće: Spisak članova Udruženja; Izvještaj o članovima AMUS-a koji ne zadovoljavaju uslov za članstvo jer nemaju niti jedno autorsko muzičko djelo, od 01.10.2019. godine; Spisak članova sa Skupštine Udruženja od 23.10.2019. godine; Odluku o usvajanju dnevnog reda, Broj: SO-10/19 od 23.10.2019. godine; odluke o usvajanju Zapisnika, Broj: SO-11/19, SO-12/19, SO-13/19 i SO-14/19, sve od 23.10.2019. godine; 28 odluka od broja: SO-15/19 do broja: SO-43/19, sve od 23.10.2019. godine; Pravilnik o poslovnoj tajni, Broj: P-03/19 od 23.10.2019. godine; Pravilnik o raspodjeli ubranih naknada, Broj: P-04/19 od 23.10.2019. godine; Pravilnik o muzičkim košuljicama, Broj: P-05/19 od 23.10.2019. godine; odluke o razrješenju predsjednika i potpredsjednika Skupštine Udruženja, br.: SO-44/19 i SO-45/19 od 23.10.2019. godine; odluke o razrješenju Upravnog odbora Udruženja, br.: SO-46/19, SO-47/19, SO-48/19, SO-49/19, SO-50/19 i SO-51/19, sve od 23.10.2019. godine; odluke o razrješenju Nadzornog odbora Udruženja, br.: SO-52/19, SO-53/19 i SO-54/19, sve od 23.10.2019. godine; odluke o imenovanju predsjednika i potpredsjednika Skupštine Udruženja, br.: SO-55/19 i SO-56/19 od 23.10.2019. godine; odluke o imenovanju Upravnog odbora Udruženja, br.: SO-57/19, SO-58/19, SO-59/19, SO-60/19, SO-61/19, SO-62/19 i SO-63/19, sve od 23.10.2019. godine; odluke o imenovanju Nadzornog odbora Udruženja, br.: SO-64/19, SO-65/19 i SO-66/19, sve od 23.10.2019. godine; odluke o usvajanju Izvještaja Radnog tijela za reviziju članstva, br.: SO-67/19, SO-68/19, SO-69/19, SO-70/19, SO-71/19 i SO-72/19, sve od 23.10.2019. godine; Izvod iz Registra, Broj: UP09-07-1-1269/19 od 07.06.2019. godine; Zapisnik sa sjednice Upravnog odbora, broj: Z-26-10/19 od 02.10.2019. godine; Obavještenje i poziv članovima Udruženja od 04.10.2019. godine.

Uvidom u dostavljene dokaze utvrđeno je da podnosilac zahtjeva nije u cjelosti postupio prema Obavještenju Ministarstva, iz slijedećih razloga:



Spisak članova Udruženja ne sadrži sve podatke propisane članom 15. stav 2. Zakona, kako je to naloženo u tački 1. Obavještenja Ministarstva, Broj: UP09-07-1-2250/19 od 06.12.2019. godine. Naime, dostavljeni Spisak ne sadrži datum prestanka članstva u Udruženju, kako je to propisano članom 15. stav 2.d) Zakona i članom 11. stav 4. alineja 4. važećeg Statuta Udruženja, Broj: 01/16 od 15.02.2016. godine.

Podnosilac zahtjeva nije dostavio Spisak redovnih članova kojima je prestalo članstvo, uz navođenje pravnog osnova prestanka članstva, a što je također naloženo u tački 1. akta Ministarstva, broj i datum prednji, iz kojeg razloga nije moguće jasno i nedvosmisleno utvrditi vjerodostojnost dostavljenog Spiska članova Udruženja.

Priloženi Izvještaj o članovima AMUS-a koji ne zadovoljavaju uslov za članstvo jer nemaju niti jedno autorsko muzičko djelo, od 01.10.2019. godine, sačinjen od Radnog tijela za reviziju članstva, se ne smatra punovažnim niti prozvodí pravno dejstvo, budući da važećim Statutom Udruženja nije propisan institut revizije članstva, niti način njegove provedbe. S tim u vezi, ni Upravni odbor Udruženja nema ovlaštenje da formira ovakvo Radno tijelo.

Nadalje, uvidom u stanje službene evidencije, koja se u ovom predmetu vodi kod Ministarstva, utvrđeno je da su članovi Upravnog odbora, imenovani Odlukom, broj: 02/16 od 15.02.2016. godine, na mandat od 4 godine, sljedeće osobe: Davor Sučić (predsjednik), Igor Vukojević (potpredsjednik), Nedim Babović (član), Nedžad Imamović (član), Enver Šadinlija (član), Almir Ajanović (član) i Amir Šehić (član).

Brižljivo ocjenom priloženih dokaza utvrđeno je da odluke o razrješenju Upravnog odbora Udruženja, br.: SO-46/19, SO-47/19, SO-48/19, SO-49/19, SO-50/19 i SO-51/19, sve od 23.10.2019. godine, nisu usklađene sa stanjem službene evidencije Ministarstva.

Uvidom u važeći Statut Udruženja, broj i datum prednji, utvrđeno je da je odredbom člana 21. stav 6. i dalje, jasno propisan način sazivanja sjednica Skupštine Udruženja, kvorum i pravila glasanja, te se iste odredbe ne mogu mijenjati ili derogirati pravnim aktima niže pravne snage, kao što je Poslovnik o radu Skupštine Udruženja. Također, u okolnostima kada odluku o sazivanju Skupštine Udruženja donosi Upravni odbor Udruženja, sukladno članu 25. stav 11. i dalje, jasno je propisan način sazivanja sjednica Upravnog odbora Udruženja, kvorum i pravila glasanja.

Slijedom odredbi Statuta, Upravni odbor Udruženja je kolektivno tijelo; te punovažnu odluku o sazivanju sjednice Skupštine Udruženja mora i donijeti Upravni odbor Udruženja. Posebno naglašavamo da odredbama Statuta Udruženja nije propisana mogućnost održavanja elektronske sjednice Upravnog odbora Udruženja, te se slijedom prednjeg Zapisnik sa sjednice Upravnog odbora Udruženja održane 02.10.2019.godine ne može smatrati punovažnim niti proizvesti pravno dejstvo.


Stoga i *Obavještenje i poziv članovima Udruženja od 04.10.2019. godine*, vlastoručno potpisan od predsjednika Upravnog odbora Udruženja Sučić Davora, bez pečata Udruženja, ne može se smatrati punovažnim i proizvoditi pravno dejstvo, budući da nije usvojen po Statutom propisanoj proceduri.

Iz prednjeg proizilazi da podnosilac Zahtjeva nije u cjelosti postupio po Obavještenju Ministarstva, Broj:UP09-07-1-2250/19 od 06.12.2019. godine, te da su ispunjeni uslovi iz člana 34. stav 1. Zakona o udruženjima i fondacijama Bosne i Hercegovine, na osnovu čega je odlučeno kao u dispozitivu Rješenja.

Na ovo Rješenje naplaćena je administrativna taksa u iznosu od 50,00 KM u skladu sa TAR.Brojem 108. Odluke o dopuni tarife administrativnih taksi, („Službeni glasnik BiH“ broj: 73/17).

#### **Pouka o pravnom lijeku:**

Protiv ovog rješenja nije dopuštena žalba, ali se može pokrenuti upravni spor tužbom pred Sudom Bosne i Hercegovine. Rok za podnošenje tužbe je 60 dana od dana prijema ovog rješenja.

  
**MINISTAR**  
**Josip Grubeša**

#### **Dostavljeno:**

- ZAJEDNIČKA ADVOKATSKA KANCELARIJA JASMIR MURATOVIĆ, TANJA HADŽAGIĆ, ILVANA BIJEDIĆ za „Asocijaciju kompozitora-muzičkih stvaralaca“,  
Ulica Branilaca Sarajeva broj 49, 71 000 SARAJEVO;
- Zbirka isprava.